

四庫全書

史部

欽定四庫全書

明史卷一百五十二

大學士張廷玉等奉敕修

列傳第四十

董倫

王景

儀智

子銘

鄒濟

王汝玉梁潛

徐善述

周述

弟孟簡

陳濟

陳繼綱

楊藩

蕭俞

山

王英

錢習禮

周叙劉儼

柯潛羅璟

孔公恂

司馬恂

董倫字安常恩人洪武十五年以張以寧薦授贊善大
夫侍懿文太子陳說剴切太祖嘉之進左春坊大學士
太子薨出為河南左參議肇州吏目蘭溪諸葛伯衡薦
倫薦之帝遽擢為陝西參議又言儒學訓導宜與冠帶
別於士子訓導始注選三十年坐事謫雲南教官雲南
初設學校倫以身教人皆嚮學建文初召拜禮部侍郎

兼翰林學士與方孝孺同侍經筵御書怡老堂額寵之
又賜髹几玉鳩杖解縉謫河州以倫言得召還倫質直
敦厚嘗勸帝睦親藩不聽成祖即位倫年已八十命致
仕尋卒其與倫同時為禮部侍郎者有王景字景彰松
陽人洪武初為懷遠教諭以博學應詔命作朝享樂章
定藩王朝覲儀累官山西參政與倫先後謫雲南建文
初召入翰林修太祖實錄用張統薦除禮部侍郎兼翰
林侍講成祖即位擢學士帝問葵建文帝禮景頓首言

宜用天子禮從之永樂六年卒於官

儀智字居真高密人洪武末與耆儒授高密訓導遷莘縣教諭擢知高郵州課農興學吏民愛之永樂元年遷寶慶知府土人健悍獨畏智相戒不敢犯召為右通政兼右中允未幾遷湖廣右布政使坐事謫役通州六年冬湖廣都指揮使龔忠入見帝問湖湘間老儒忠以智對即日召之既至拜禮部左侍郎十一年元旦日當食尚書呂震請朝賀如常智持不可會左諭德楊士奇亦

以為言乃免賀如智議十四年詔吏部翰林院擇耆儒
侍太孫士奇及蹇義首薦智太子曰吾嘗舉李繼鼎大
悞悔無及智誠端士然老矣士奇頓首言智起家學官
明理守正雖耄精神未衰廷臣中老成正大無踰智者
是日午朝帝顧太子曰侍太孫講讀得人未太子對曰
舉禮部侍郎儀智議未決帝喜曰智雖老能直言可用
也遂命輔導皇太孫每進講書史必反覆啓迪以正心
術為本十九年年八十致仕卒於家洪熙元年贈太子

少保謚文簡季子銘字子新宣宗即位以侍郎戴綸薦授行在禮科給事中九年秩滿帝念智舊勞改銘修撰正統三年預修宣廟實錄成遷侍講後改成府長史郎王監國視朝午門廷臣劾王振叫號莫辨人聲銘獨造膝前免冠數奏下令旨族振衆譁始息景帝即位力贊征伐諸大事尋以潛邸恩授禮部右侍郎明年兼經筵官帝每臨講幄輒命中官擲金錢於地任講官遍拾之號恩典文臣與者內閣高穀等外惟銘與俞山俞綱蕭

鐵趙琬數人尋進南京禮部尚書懷獻太子立加太子
太保召為兵部尚書兼詹事蘇州淮安諸郡積雪民凍
餓死者相枕藉沙灣築河役山東河南九萬人責民間
鐵器數萬具銘請於帝多所寬恤因災異言消弭在敬
天法祖省刑薄斂節用愛人錄皇明祖訓錄以進深見
獎納卒謚忠襄銘少學於吳訥天性孝友易直有父風
長子海錦衣衛百戶季子泰舉於鄉為禮科給事中並
以父恩授云

鄒濟字汝舟餘杭人事母以孝聞博學強記尤長春秋
為餘杭訓導師法嚴累遷國子學錄助教以薦知平度
州永樂初預修太祖實錄成除禮部郎中征安南從幕
府司奏記還為廣東右參政再遷左春坊左庶子授皇
孫經濟為人和易坦夷無貴賤皆樂親之秩滿進少詹
事當是時宮僚多得罪徐善述王汝玉馬京梁潛輩被
讒相繼下獄死濟積憂得疾皇太子以書慰曰卿善自
攝即有不諱當提攜卿息不使墜蓬蒿也卒年六十八

洪熙元年贈太子少保謚文敏命有司立祠墓側春秋
祀之子幹字宗盛濟卒時尚幼仁宗監國命為應天府
學生月賜鈔米舉正統四年進士景帝初由兵部郎中
超擢本部右侍郎以才為于謙所倚額森入寇九門皆
閉百姓避兵者號城下求入幹開門納之尋改禮部兼
庶子考察山西官吏黜布政使侯復以下五十餘人巡
視河南鳳陽水災與王竑請振又請令諸生輸粟入監
讀書納粟入監自此始成化十二年振畿內饑再遷禮

部尚書加太子少保被劾乞休卒謚康靖徐善述字好古天台人洪武中行歲貢法善述首貢入太學授桂陽州學正永樂初以國子博士擢春坊司直郎見重於皇太子每稱為先生嘗致書賜酒及詩遷右贊善坐累死與鄒濟同日贈太子少師謚文肅立祠春秋祀亦如濟王汝玉名璣以字行長洲人穎敏強記少從楊維禎學年十七舉於鄉永樂初由應天府學訓導擢翰林五經博士歷遷右春坊右贊善預修永樂大典仁宗在東宮

特被寵遇群臣應制撰神龜賦汝玉第一解縉次之七年坐修禮書忤制度當戍邊皇太子監國宥之以為翰林典籍尋進左贊善坐解縉累瘐死洪熙初贈太子賓客謚文靖遣官祭其家梁潛字用之泰和人洪武末舉鄉試授四川蒼溪訓導以薦除知四會縣改陽江陽春皆以廉平稱永樂元年召修太祖實錄書成擢修撰尋兼右春坊右贊善代鄭賜總裁永樂大典帝幸北京屢驛召赴行在十五年復幸北京太子監國帝親擇侍從

臣翰林獨楊士奇以潛副之有陳千戶者擅取民財令
旨謫交趾數日後念其有軍功貸還或讒於帝曰上所
謫罪人皇太子曲宥之矣帝怒誅陳千戶事連潛及司
諫周冕逮至行在親詰之潛等具以實對帝謂楊榮呂
震曰事豈得由潛然卒無人為白者俱繫獄或毀冕放
恣遂併潛誅潛妻楊氏痛潛非命不食死子榮由進士
為刑部主事善辨冤獄用薦擢廣西副使進布政使將
士多殺良民報功榮諭其帥生致難民一人准功一級

全活無算田州土官岑鑑兄弟相讎言察為之解却其厚
餽撫服梗化女土官民夷服其信義終浙江布政使

周述字崇述吉水人永樂二年與從弟孟簡並進士及
第帝手題二人策獎賞之並授翰林編修尋詔解縉選
曾榮等二十八人讀書文淵閣述孟簡皆與焉司禮監
給紙筆光祿給朝暮饌禮部月給膏燭鈔人三錠工部
擇近宅居之一時以為榮述嘗扈北巡累進左春坊諭
德仁宗即位命從皇太子謁陵南京召至榻前問所以

匡弼儲君者對稱旨宣宗時進左庶子正統初卒官孟簡在翰林二十年始遷詹事府丞出為襄王府長史有言宜留備顧問者帝曰輔朕弟尤勝於輔朕也述溫厚簡靜未嘗有疾言遽色文章雅贍孟簡謙退不伐生平無睚眦於人並為世所重云

陳濟字伯載武進人讀書過目成誦嘗以父命如錢塘家人齎貨以從比還以其貲之半市書口誦手鈔十餘年盡通經史百家之言成祖詔修永樂大典用大臣薦

以布衣召為都總裁修撰曾棨等為之副詞臣纂修者及太學儒生數千人緝祕庫書數百萬卷浩無端倪濟與少師姚廣孝等數人發凡起例區分鉤考秩然有法執筆者有所疑輒就濟質問應口辨析無滯書成授右贊善謹慎無過皇太子甚禮重之凡稽古纂集之事悉以屬濟隨事敷奏多所裨益五皇孫皆從受經居職十五年而卒年六十二濟少有酒過母戒之終其身未嘗至醉弟洽為兵部尚書事濟如父濟深懼盛滿弭自謙

抑所居蓬戶葦壁裁蔽風雨終日危坐手不釋卷為丈
根據經史不事葩藻嘗云文貴如布帛菽粟有益於世
爾其後有陳繼楊翦者亦以布衣通經用楊士奇薦繼
由博士入翰林而翦竟用景帝潛邸恩與俞山俞綱等
皆至大官自天順後始漸拘資格編修馬昇檢討傅宗
不由科目李賢皆出之為參議布衣無得預館閣者而
弘治間潘辰獨以才望得之一時詫異數焉陳繼字嗣
初吳人幼孤母吳氏躬織以資誦讀比長貫穿經學人

呼為陳五經奉母至孝府縣交薦以母老不就母卒哀毀過人永樂中復舉孝行旌其母曰貞節仁宗即位開弘文閣帝臨幸問今山林亦有名士乎楊士奇初不識繼夏原吉治水蘇松得其文歸以示士奇士奇心識之及帝問遂以繼對召為國子博士尋改翰林五經博士直弘文閣宣宗初遷檢討引疾歸卒楊翥字仲舉亦吳人少孤貧隨兄戍武昌授徒自給楊士奇微時流寄窘乏翥輒解館舍讓之而已教授他所士奇心賢之及貴

薦翦經明行修宣宗詔試吏部稱旨授翰林院檢討歷
修撰正統中詔簡邨王府僚諸翰林皆不欲行乃出侍
講儀銘及翦為左右長史久之引年歸王即大位入朝
拜禮部右侍郎景泰三年進尚書給祿致仕明年卒年
八十五翦篤行絕俗一時縉紳厚德者翦為最既沒景
帝念之召其子肆入覲授本邑主簿俞山字積之秀水
人由鄉舉為邨府伴讀景帝時拜吏部右侍郎而嘉興
俞綱由諸生繕寫實錄試中書舍人授邨府審理景帝

時以兵部右侍郎入閣預機務居三日固辭守本官景
帝將易東宮山憲疏諫不聽懷獻太子立加太子少傅
山意不自安致仕去綱加太子少保英宗復辟山以致
仕得免而綱當景泰時能周旋二帝間故得調南京禮
部成化初致仕卒潘辰字時用景寧人少孤隨從父家
京師以文學名弘治六年詔天下舉才德之士隱於山
林者府尹唐恂舉辰吏部以辰生長京師寢之恂復奏
給事中王綸夏昂亦交章薦乃授翰林待詔久之掌典

籍事預修會典成進五經博士正德中劉瑾摘會典小疵復降為典籍俄還故官南京缺祭酒吏部推石琚及辰帝以命琚而擢辰編修居九年超擢太常少卿致仕歸卒特賜祭葬辰居官勤慎晨入夜歸典制誥時有以幣酬者堅却之士大夫重其學行稱為南屏先生

王英字時彥金谿人永樂二年進士選庶吉士讀書文淵閣帝察其慎密令與王直書機密文字與修太祖實錄授翰林院修撰進侍讀二十年扈從北征師旋過李

陵城帝聞城中有石碑召英往視既至不識碑所而城北門有石出土尺餘發之乃元時李陵臺驛令謝某德政碑也碑陰刻達魯噶齊等名氏具以奏帝曰碑有蒙古名異日且以為已地啓爭端命再往擊碎之沈諸河還奏帝喜其詳審曰爾是二十八人中讀書者朕且用爾因問以北伐事英曰天威親征彼必遠遁願勿窮追帝笑曰秀才謂朕黷武邪因曰軍中動靜有聞即入奏且諭中官勿阻立功官軍有過命勿與糧相聚泣以英

奏復給予仁宗即位累進右春坊大學士乞省親歸宣
宗立還朝是時海內宴安天子雅意文章每與諸學士
談論文藝賞花賦詩禮接優渥嘗謂英曰洪武中學士
有宋濂吳沈朱善劉三吾永樂初則解縉胡廣汝勉之
毋俾前人獨專其美修太宗仁宗實錄成遣少詹事賜
麒麟帶母喪特與葬祭遣中官護歸尋起復正統元年
命侍經筵總裁宣宗實錄進禮部侍郎八年命理部事
浙江民疫遣祭南鎮時久旱英至大雨民呼侍郎雨年

七十再乞休不許十二年英子按察副使裕坐事下獄
英上疏待罪宥不問明年進南京禮部尚書俾就閒逸
居二年卒年七十五賜祭葬謚文安英端凝持重歷仕
四朝在翰林四十餘年屢為會試考官朝廷制作多出
其手四方求銘志碑記者不絕性直諒好規人過三楊
皆不喜故不得柄用裕後累官四川按察使

錢習禮名幹以字行吉水人永樂九年進士選庶吉士
尋授檢討習禮與練子寧姻戚既仕鄉人以奸黨持之

恒惴惴楊榮乘間言於帝帝笑曰使子寧在朕猶當用之况習禮乎仁宗即位遷侍讀知制誥以省親歸宣德元年修兩朝實錄與侍講陳敬宗陳循同召還進侍讀學士英宗開經筵為講官宣宗實錄成擢學士掌院事七年以故鴻臚寺為翰林院落成諸殿閣大學士皆至習禮不設楊士奇楊溥座曰此非三公府也士奇等以聞帝命具座後遂為故事正統九年乞致仕不許明年六部侍郎多闕帝命吏部尚書王直會大臣推舉而特

旨擢習禮於禮部習禮力辭不允王振用事違官多造其門習禮恥為屈十二年六月復上章乞骸骨乃得歸習禮篤行誼好古秉禮動有矩則家居十五年卒年八十有九謚文肅

周叙字公叙吉水人年十一能詩永樂十六年進士選庶吉士作黃鸝鵲賦稱旨授編修歷官侍讀直經筵正統六年上疏言事帝嘉納焉八月夏又上言比天旱陛下責躬虔禱而臣下不聞效忠補過之言徒陳情乞用

而已掌銓選者罔論賢否第循資格司國計者不問耕桑惟勤賦斂軍士困役作刑罰失重輕風憲無激揚言官務緘默僧道數萬日耗戶口流民衆多莫為矜恤帝以章示諸大臣王直等皆引罪求罷十一年遷南京侍講學士邲王監國馳疏言君父之讐不共戴天殿下宜臥薪嘗膽如越之報吳使智者獻謀勇者効力務掃北庭雪國恥先遣辨士卑詞重幣乞還鑾輿暫為君父屈因條上勵剛明親經史修軍政選賢才安民心廣言政

謹微漸修庶政八事王嘉納之景泰二年又請復午朝
日接大臣咨諏治道經筵之餘召文學從臣講論政事
并詔天下臣民直言時政缺失帝因詔求言叙負氣節
篤行誼曾祖以立在元時以宋遼金三史體例未當欲
重修叙思繼先志正統末請於朝詔許自撰銓次數年
未及成而卒同邑劉儼字宣化正統七年進士第一歷
官太常少卿景泰中典順天鄉試黜大學士陳循王文
子幾得危禍詳高穀傳天順初改掌翰林院事卒官贈

柯潛字孟時莆田人景泰二年舉進士第一歷洗馬天

順初遷尚寶少卿兼修撰憲宗即位以舊宮僚擢翰林

學士英宗實錄成進少詹事慈懿太后之喪潛與修撰

羅璟上章請合葬裕陵廷臣相繼爭未報潛曰朝廷大

事臣子大節舍是奚所用心與璟皆再疏爭竟得如禮

連遭父母喪詔起為祭酒固乞終制許之未幾卒潛邃

於文學性高介為學士時即院中後圃構清風亭鑿池

時芙蓉植二栢於後堂人稱其亭為柯亭栢為學士栢
院中有井學士劉定之所浚也柯亭劉井翰林中以為
美談云羅璟字仲明泰和人天順中進士及第授編修
進修撰預修宋元通鑑綱目累官洗馬孝宗為太子簡
侍講讀母喪歸璟與尚書尹旻子侍講龍同娶於孔氏
旻得罪李汝省指璟為旻黨調南京禮部員外郎孝宗
嗣位王恕等言璟才乃授福建提學副使弘治五年召
為南京祭酒久之卒

孔公恂字宗文先聖五十八世孫也景泰五年舉會試
聞母疾不赴廷對帝以問禮部具言其故乃遣使召之
日且午不及備試卷命翰林院給以筆札登第即丁母
憂歸衍聖公孔彥縉卒孫弘緒幼弱詔遣禮部郎治喪
公恂理其家事天順初授禮科給事中弘緒已襲封大
學士李賢妻以女公恂因得交於賢賢言公恂大聖人
後贊善司馬恂宋大賢溫國公先後宜輔導太子帝喜
同日超拜少詹事侍東宮講讀入語孝肅皇后曰吾今

日得聖賢子孫為汝子傳孝肅皇后者憲宗生母方以
皇貴妃有寵於是具冠服拜謝宮中傳以為盛事云憲
宗嗣位改公恂大理左少卿公恂言不通法律乃復少
詹事成化二年上章言兵事諸武臣譁然給事御史交
章駁之下獄謫漢陽知府未至丁父憂服闋商輅請復
建言得罪者官乃還故秩涖南京詹事府久之卒司馬
恂字恂如浙江山陰人正統末由舉人擢刑科給事中
累遷少詹事憲宗立命兼國子祭酒卒贈禮部左侍郎

恂強記敦厚與物無忤居官無所表見

贊曰建文之初修尊賢敬老之節董倫以宿儒見重雖
寡所表見當非苟焉已也儀智父子仍世以儒術進從
容輔道蓋其賢哉鄒濟諸人以宮僚被遇而讒構不免
陳濟輩起布衣列禁近而善始終固有幸不幸與二周
耳英錢習禮周叙柯潛謙和直諒各著其美蓋皆異於
浮華博習之徒矣

明卷卷一百五十二終

欽定四庫全書

明史卷一百五十二考證

董倫傳董倫字安常恩人

臣方煒按傳維鱗明書董

倫宛平人其先為恩縣人今獻脩遺同史止作恩人
但指其舊貫言耳謹識

董倫傳出為河南左叅議

臣方煒按傳維鱗明書云

二十五年出為河南左叅政史作河南左叅議今獻

脩遺與史同謹識闕疑

董倫傳坐事謫雲南

臣方煒按董倫謫雲南史不詳

坐事原委考傳維鱗明書今獻脩遺俱云註誤免官
典教滇南謹識

儀智傳坐事謫役通州

臣方煒按儀智謫役通州史

不詳坐事原委考傳維鱗鄧元錫各明書今獻備遺
名臣實錄均不載被謫事無憑考核謹識闕疑

儀智傳贈太子少保

臣方煒按傳維鱗明書今獻脩

遺鄧元錫明書俱書贈太子少師史作贈太子少保

不知何據謹識闕疑

儀智傳子銘附宣宗即位以侍郎戴綸薦授行在禮科

給事中

臣方煒按儀銘授官傳維鱗明書及鄧元

錫明書俱作舉經明行脩史祇云以戴綸薦又按明書今獻脩遺俱作洪熙時為行在禮科給事中史作宣宗時事不知何據謹闕疑

儀智傳

子銘附

帝念智舊勞改銘修撰

臣方煒按銘

改史職傳維鱗明書今獻備遺俱云內府校書改編

修史作念智舊勞改銘修撰彼此小異謹識

鄒濟傳永樂初預修太祖實錄成除禮部郎中 臣方

煒按傳維鱗明書云陞禮部郎中已而脩永樂大典

諸儒臣推濟總裁楊士奇所撰墓誌銘云詔修永樂

大典以五人總裁而濟與焉史略之謹識

鄒濟傳再遷左春坊左庶子 臣方煒按傳維鱗明書

坐事改考功郎中仁宗留守南京擇宮僚改左庶子

史略之謹識

鄒濟傳

子幹附

被劾乞休

臣方煒按鄒幹被劾史不

載劾係何人亦不詳所劾何事考傳維鱗明書祇言致仕卒他無可證謹識闕疑

鄒濟傳

徐善述附

坐累死與鄒濟同日

臣方煒按善

述之死史不詳坐累之由考仁宗本紀云黃儼等復譖太子擅赦罪人官僚多坐死者鄧元錫明書云監國時官僚以譖故得罪獄死者徐善述王汝玉馬京梁潛周冕則善述因被譖連坐而死無疑謹識

鄒濟傳王汝玉附 羣臣應制撰神龜賦汝玉第一 臣

方煒按獻徵錄云汝玉文兼古今體賦尤瞻麗詩語雋永得唐人風格所著有青城山人集謹識

陳濟傳為文根據經史不事葩藻 臣方煒按獻徵錄

云所著有綱目集覽正誤若干卷文集若干卷謹識

王英傳仁宗即位累進右春坊大學士 臣方煒按傳

維鱗明書成祖崩太子命英與諸大臣定喪禮議國事宿內閣凡七日史畧此事於前則後文所謂不得

朽用無根矣謹識

王英傳進禮部侍郎八年命理部事

臣方煒按傳維

鱗明書英陞禮部左侍郎兼侍講學士正維八年出
理部事蓋英自書機密文字歷遷學士雖佐春官仍
充內職至此始去翰林治部事與庶等未始非三楊
扼之也畧兼侍講學士之事則下文命理部事不明
貫耳謹識

王英傳英子按察副使裕坐事下獄

臣方煒按王裕

下獄史不詳坐事原委諸書俱無考謹識闕疑

王英傳謚文安

臣方煒按名臣實錄英初謚文安改

謚文忠史但指其初謚言耳謹謚

錢習禮傳以故鴻臚寺為翰林院落成諸殿閣大學士皆至習禮不設楊士奇楊溥座曰此非三公府也士奇等以聞帝命具座後遂為故事 臣方煒按詞林

典故正統七年掌院事學士錢習禮不設西楊南楊公座曰此非三公府也至期二楊以聞乃命工部具

椅案禮部尚書胡濙定位次左設大學士三座學士一座而讀講學士東西對列謹識

周敘傳

劉儼附

劉儼字宣化

臣方煒按儼屢與脩五

倫書君監書脩寰宇通志玉牒總裁復領續宋元通鑑綱目屢有賜賚史略之謹識

柯潛傳英宗實錄成進少詹事

臣方煒按修英宗實

錄之前凡歷代君監寰宇通志玉牒諸書潛皆預修馬累賜白金文綺後以古文詞教庶吉士李東陽等

又教庶吉士林瀚等典應天順天鄉試兩典會試俱見於獻徵錄史畧之謹識

柯潛傳為學士時即院中後圃構清風亭鑿池蒔芙蓉植二栢於後堂人稱其亭為柯亭栢為學士栢院中有井學士劉定之所浚也柯亭劉井翰林中以為美談云

臣

方煒按詞林典故翰林院劉井學士劉定

之所浚在公署後堂之左柯亭學士柯潛所建在公署後堂之右後堂有二栢亦潛所種又云柯潛既總

院章就詞林後圃結清風亭亭下鑿池時運決渠引
泉公退偃坐其中脩然真若登瀛洲者謹識

孔公恂傳上章言兵事諸武臣譁然

臣方煒按獻徵

錄云令撫寧侯朱永出征公恂上章留之言永當時
武臣一人而已為衆所嫉被劾史但言上章兵之事
不詳所言謹識

明史卷一百五十二考證

欽定四庫全書

史部

明史卷一百五十三

四

御史_臣李陽祿覆勘

總校官編修臣朱鈴

欽定四庫全書

明史卷一百五十三

大學士張廷玉等奉 敕修

列傳第四十一

宋禮字大本河南永寧人洪武中以國子生擢山西按察司僉事左遷戶部主事建文初薦授陝西按察僉事

瑜周忱

復坐事左遷刑部員外郎成祖即位命署禮部事以敏

練擢禮部郎永樂二年拜工部尚書嘗欲請給山東屯田牛種又請犯罪無力准工者徙北京為民並報可七年丁母憂詔留視事九年命開會通河會通河者元至元中以壽張尹韓仲暉言自東平安民山鑿河至臨清引汶絕濟屬之衛河為轉漕道名曰會通然岸狹水淺不任重載故終元世海運為多明初諭餉遼東北平亦專用海運洪武二十四年河決原武絕安山湖會通遂淤永樂初建北京河海兼運海運險遠多失亡而河運

則由江淮達陽武發山西河南丁夫陸輓百七十里入
衛河厯入遞運所民苦其勞至是濟寧州同知潘叔正
上言舊會通河四百五十餘里淤者乃三之一濬之便
於是命禮及刑部侍郎金純都督周長往治之禮以會
通之源必資汶水乃用汶上老人白英策築埝城及戴
村壩橫亘五里遏汶流使無南入洸而北歸海匯諸泉
之水盡出汶上至南旺中分之為二道南流接徐沛者
十之四北流達臨清者十之六南旺地勢高決其水南

北皆注所為水脊也因相地置閘以時蓄洩自分水北至臨清地降九十尺置閘十有七而達于衛南至沽頭地降百十有六尺置閘二十有一而達于淮凡發山東及徐州應天鎮江民三十萬蠲租一百一十萬石有奇二十旬而工成又奏濬沙河入馬常泊以益汶語詳河渠至是年帝復用工部侍郎張信言使興安伯徐亨工部侍郎蔣廷瓚會金純濬祥符魚王口至中灤下復舊黃河道以殺水勢使河不病漕命禮兼董之八月還京

師論工第一受上賞潘叔正亦賜衣鈔明年以御史許
堪言衛河水患命禮往經畫禮請自魏家灣開支河二
泄水入土河復自德州西北開支河一泄水入舊黃河
使至海豐大沽河入海帝命俟秋成後為之禮還言海
運經歷險阻每歲船輒損敗有漂沒者有司修補迫于
期限多科斂為民病而船亦不堅計海船一艘用百人
而運千石其費可辦河船容二百石者二十船用十人
可運四千石以此而論利病較然請撥鎮江鳳陽淮安

揚州及兗州糧合百萬石從河運給北京其海道則三歲兩運已而平江伯陳瑄治江淮間諸河工亦相繼告竣於是河運大便利漕粟益多十三年遂罷海運初帝將營北京命禮取材川蜀禮伐山通道奏言得大木數株皆尋丈一夕自出谷中抵江上聲如雷不偃一草朝廷以為瑞及河工成復以採木入蜀十六年命治獄江西明年造番舟自蜀召還以老疾免朝叅有奏事令侍郎代二十年七月卒于官禮性剛馭下嚴急故易集事

以是亦不為人所親卒之日家無餘財洪熙改元禮部尚書呂震請予葬祭如制弘治中主事王寵始請立祠詔祀之南旺湖上以金純周長配隆慶六年贈禮太子太保蘭芳夏縣人洪武中舉孝廉累遷刑部郎中永樂中出為吉安知府寬厚廉潔民甚德之吉水民詣闕言縣有銀礦遣使覆視父老遮芳訴曰聞宋季嘗有言此者卒以妄得罪今皆樹藝地安所得銀礦芳詰告者知其誣獄具同官不敢署名芳請獨任之奏上帝曰吾固

知妄也得寢已坐事謫辦事官從宋禮治會通河復為
工部都水主事十年河決陽武灌中牟祥符尉氏遣芳
按視芳言中鹽隄當暴流之衝請加築塞又言自中灤
分導河流使由故道北入海誠萬世利又言新築岸埽
止用草索不能堅久宜編木成大圉貫椿其中實以瓦
石復以木橫貫椿表牽築堤上則殺水固隄之長策也
詔悉從之其後築隄者遵用其法以宋禮薦擢工部右
侍郎亡何行太僕卿楊砥言吳橋東光興濟交河及天

津屯田雨水決隄傷稼乞開德州良店東南黃河故道以分水勢復命芳往治之所經郡邑有不便民者輒疏以聞事竣還十五年十一月卒于官自奉約衣布衣蔬食事母至孝母甚賢芳所治事暮必告母有不當輒加教誡芳受命唯謹由是為良吏云

陳瑄字彥純合肥人父聞以義兵千戶歸太祖累官都指揮同知瑄代父職父坐事戍遼陽瑄伏闕請代詔併原其父子瑄少從大將軍幕以射雁見稱屢從征南番

又征越舊討建昌叛番嚕呖特穆爾踰梁山平天星寨
破寧番諸蠻復征鹽井進攻卜木瓦寨賊熾甚瑄將中
軍賊圍之數重瑄下馬射傷足裏創戰自己至酉全師
還又從征賈哈喇以奇兵涉達崇河得間道作浮梁渡
軍既渡撤梁示士卒不返連戰破賊又會雲南兵征百
夷有功遷四川行都司都指揮同知建文米遷右軍都
督僉事燕兵逼命總舟師防江上燕兵至浦口瑄以舟
師迎降成祖遂渡江既即位封平江伯食祿一千石賜

誥券世襲指揮使永樂元年命瑄充總兵官總督海運
輸粟四十九萬餘石餉北京及遼東遂建百萬倉於直
沽城天津衛先是漕舟行海上島人畏漕卒多閉匿瑄
招令互市平其直人交便之運舟還會倭寇沙門島瑄
追擊至金州白山島焚其舟殆盡九年命與豐城侯李
彬統浙閩兵捕海寇海溢隄圯自海門至鹽城凡百三
十里命瑄以四十萬卒築治之為捍潮隄萬八千餘丈
明年瑄言嘉定瀕海地江流衝會海舟停泊于此無高

山大陵可依請於青浦築土山方百丈高三十餘丈立
堠表識既成賜名寶山帝親為文記之宋禮既治會通
河成朝廷議罷海運仍以瑄董漕運議造淺船二千餘
艘初運二百萬石寢至五百萬石國用以饒時江南漕
舟抵淮安率陸運過壩踰淮達清河勞費甚鉅十三年
瑄用故老言自淮安城西管家湖鑿渠二十里為清江
浦導湖水入淮築四閘以時宣洩又緣湖十里築隄引
舟由是漕舟直達於河省費不訾其後復濟徐州至濬

寧河又以呂梁洪險惡于西別鑿一渠置二閘蓄水通漕又築沛縣刁陽湖濟寧南旺湖長堤開泰州白塔河通大江又築高郵湖隄于隄內鑿隄四千里避風濤之險又自淮至臨清相水勢置閘四十有七作常盈倉四十區于淮上及徐州臨清通州皆置倉便轉輸慮漕舟膠淺自淮至通州置舍五百六十八舍置卒導舟避淺復緣河堤鑿井樹木以便行人凡所規畫精密宏遠身理漕河者三十年舉無遺策仁宗即位之九月瑄上疏

陳七事一曰南京國家之本乞嚴守備二曰推舉宜覈實無循資格選朝臣公正者分巡天下三曰天下歲運糴餉湖廣江西浙江及蘇松諸府並去北京遠往復踰年上通公租下妨農事乞令轉至淮徐等處別令官軍接運至京又快船馬船所載不過五六十石每船官軍足用有司添差軍民遞送拘集聽候至有凍餒請革罷四曰教職多非其人乞考不職者黜之選俊秀補生員而軍中子弟亦令入學五曰軍伍竄亡乞覈其老疾者

以子弟代逃亡者追補戶絕者驗除六曰開平等處邊防要地兵食虛乏乞選練銳士屯守兼務七曰漕運官軍每歲北上歸即修船勤苦終年諉衛所又於其隙雜役以重困之乞加禁絕帝覽奏曰瑄言皆當令所司逕行遂降敕獎諭尋賜券世襲平江伯宣宗即位命守淮安督漕運如故宣德四年言濟寧以北自長溝至棗林淤塞計用十二萬人疏濬半月可成帝念瑄久勞命尚書黃福往同經理六年瑄言歲運糧用軍十二萬人頻

年勞苦乞於蘇松諸郡及江西浙江湖廣別僉民丁又於軍多衛所僉軍通為二十四萬人分番迭運又江南之民運糧赴臨清淮安徐州往返一年失悞農業而湖廣江西浙江及蘇松安慶軍士每歲以空舟赴淮安載糧若令江南民撥糧與附近衛所官軍運載至京量給耗米及道里費則軍民交便帝命黃福及侍郎王佐議行之更民運為兌運自此始也八年十月卒于官年六十有九追封平江侯贈太保謚恭襄初瑄以濬河有德

於民立祠清河縣正統中命有司春秋致祭孫豫字
立卿讀書修謹正統末福建沙縣賊起以副總兵從寧
陽侯陳懋分道討平之進封侯額森入犯出鎮臨清建
城堡練兵撫民安靜不擾明年召還父老詣闕請留從
之景泰五年山東饑奉詔振卹尋守備南京天順元年
召還益歲祿百石三年卒贈黔國公諡莊敏子銳嗣伯
成化初分典三千營及團營尋佩平蠻將軍印總制兩
廣移鎮淮安總督漕運建淮河口石閘及濟寧分水南

北二閘築堤疏泉修舉廢墜總漕十四年章數十上日本貢使買民男女數人以歸道淮安銳留不遣贖還其家准揚饑疫煮糜施藥多所存濟弘治六年河決張秋奉敕塞治還增祿二百石累加太傅兼太子太傅十三年和碩寇大同銳以總兵官佩將軍印往援既至擁兵自守為給事中御史所劾奪祿閒住其年卒子熊嗣正德三年出督漕運劉瑾索金錢熊不應銜之坐事逮下詔獄謫戍海南衛奪誥券熊故贖貨在淮南頗殃民雖

為瑾構陷人無惜之者瑾誅赦還復爵卒無子再從子
圭嗣以薦出鎮兩廣封川寇起圭督諸將往討擒其魁
俘斬數千加太子太保復平柳慶及賀連山賊加太保
蔭一子安南范子儀等寇欽廉黎岐賊寇瓊厓相特角
圭移文安南曉以利害使縛子儀而急出兵攻黎岐敗
走之論功復蔭一子加歲祿四十石圭能與士卒同甘
苦聞賊所在輒擐甲先登深箐絕壑衝冒瘴毒無所避
以故所向克捷在粵且十年殲諸小賊不可勝數召還

掌後軍府主妻仇氏咸寧侯鸞女弟也主深嫉鸞鸞數短主于世宗幾得罪鸞敗帝益重主命總京營兵寇入紇荊關主請出戰營于盧溝寇退而止明年寇復入古北口或議列營九門為備主以徒示弱無益寇亦尋退董築京師外城加太子太傅卒贈太傅謚武襄子王謨嗣僉書後軍出鎮兩廣賊張璉及屠掠數郡王謨會從督張臬討平之擒斬三萬餘論功加太子太保蔭一子萬厯中出鎮淮安總漕運入掌前軍府事卒贈少保謚

武靖傳至明亡爵絕王瑜字廷器山陽人以總旗歸趙王府永樂末常山護衛指揮孟賢等與宦官黃儼結謀弑帝廢太子而立趙王其黨高正者瑜舅也密告瑜瑜大驚曰奈何為此族滅計垂涕諫不聽正懼謀泄將殺瑜瑜遂詣闕告變按治有驗賢等盡伏誅而授瑜遼海衛千戶仁宗即位擢錦衣衛指揮同知厚賜之并戒同官事必白瑜乃行瑜持大體不為苛細廷中稱其賢宣德八年進都指揮僉事充左副總兵代陳瑄鎮淮安董

漕運累進右軍都督僉事淮安瑜故鄉也人以為榮任
淮數年守瑄成法不變有善政民有親在與弟訟產者
瑜曰訟弟不友無親不孝杖而斥之又有負金不能償
至翁壻兄弟相訟者瑜曰奈何以財故傷恩即代償勸
其敦睦二卒盜敗舟一板有司以盜官物坐卒死瑜曰
兩卒之命抵敗舟一板耶竟得末減歲凶發官廩以振
然性好貸為英宗切責而前所發不執事有枉者正統
四年議事入京得疾求兩手如高懸狀號救求解而卒

周忱字尚如吉水人永樂二年進士選庶吉士明年成
祖擇其中二十八人令進學文淵閣忱自陳年少乞預
帝嘉其有志許之尋擢刑部主事進員外郎忱有經世
才浮沉郎署二十年人無知者獨夏原吉奇之於熙改
元稍遷越府長史宣德初有瀉為郡守者原吉曰此常
調也安足盡周君五年九月帝以天下財賦多不理而
江南為甚蘇州一郡積逋至八百萬石思得才力重臣
往釐之乃用大學士楊榮薦遷忱工部右侍郎巡撫江

南諸府總督稅糧始至召父老問逋稅故皆言豪戶不肯加耗并徵之細民民貧逃亡而稅額益缺忱乃創為平米法令出耗必均又請敕工部頒鐵斛下諸縣準式草糧長之大入小出者舊例糧長正副三人以七月赴南京戶部領勘合既畢復齎送部往反資費皆料餉充之忱止設正副各一人循環赴領訖事有司類收上之部民大便忱見諸縣收糧無團局糧長即家貯之曰此致逋之由也遂令諸縣於水次置團圍設糧頭團戶各

一人名轄收至六七萬石以上始立糧長一人總之名
總收民持帖赴國官為監納糧長但奉期會而已置撥
運綱運二簿撥運記支撥起運之數預計所運京師通
州諸倉耗以次定支綱運聽其填注剝淺諸費歸以償
之支撥羨餘存貯在倉曰餘米次年餘多則加六徵又
次年加五徵初太祖平吳盡籍其功臣子弟莊田入官
後惡富民豪并坐罪沒入田產皆謂之官田按其家租
籍征之故蘇賦比他府獨重官民田租共二百七十七

萬石而官田之租乃至二百六十二萬石民不能堪時
宣宗屢下詔減官田租忱乃與知府況鍾曲算累月減
至七十二萬餘石他府以次減民始少甦七年江南大
稔詔令諸府縣以官鈔平糴備振貸蘇州遂得米二十
九萬石故時公侯祿米軍官月俸皆支於南戶部蘇松
民轉輸南京者石加費六斗忱奏令就各府支給與船
價米一斗所餘五斗通計米四十萬石有奇并官鈔所
糴共得米七十萬餘石遂置倉貯之名曰濟農振貸之

外歲有餘羨凡網運風漂盜奪者皆借給于此秋成抵
數還官其修圩築岸開河濬湖所支口糧不責償耕者
借貸必驗中下事力及田多寡給之秋與糧並賦凶歲
再振其姦頑不償者後不復給定為條約以聞帝嘉獎
之終忱在任江南數大郡小民不知凶歲兩稅未嘗逋
負忱之力也時漕運軍民相半軍船給之官民則僦舟
加以雜耗率三石致一石柱復經年失農業忱與平江
伯陳瑄議民運至淮安或瓜洲水次交兌漕軍運抵通

州淮安石加五斗瓜洲又益五升其附近并南京軍未
過江者即倉交兌加與過江米二斗襯墊蘆蓆與折米
五合兌軍或後期阻風則令州縣支贏米設殿于瓜洲
水次遷米貯之量支餘米給守者由是漕費大省民間
馬草歲運兩京勞費不訾忱請每束折銀三分南京則
輕齎即地買納京師百官月俸皆持捧帖赴領南京米
賤時俸帖七八石僅易銀一兩忱請檢重額官田極貧
下戶兩稅準折納金花銀每兩當米四石解京兌俸民

出甚少而官俸嘗足嘉定崑山諸縣歲納布疋重三斤
抵糧一石比解以縷粗見斥者十八九忱言布縷細必
輕然價益高今既貴重勢不容細乞自今不拘輕重務
取長廣如式從之各郡驛馬及一切供帳舊皆領於馬
頭有耗損則馬頭橫科補買忱令田畝出米升九合與
秋糧俱征驗馬上中下直給米正統初淮揚災鹽課虧
敕忱巡視奏令蘇州諸府撥餘米一二萬石運揚州益
場聽抵明年田租竈戶得納鹽給米時米貴益賤官得

積鹽民得食米公私大濟尋敕兼理松江鹽課華亭上海二縣逋課至六十三萬餘引竈丁逃亡忱謂田賦宜養農夫鹽課宜養竈丁因上便宜四事命速行之忱為節竈戶運耗得米三萬二千餘石亦倣濟農倉法置贍鹽倉並補逃亡缺額由是鹽課大殖浙江當造海船五十艘下忱計度忱召問都匠言一艘須米千石忱以成大事不宜惜費第減二十石奏于朝竟得報可以九載秩滿進左侍郎六年命兼理湖州嘉興二府稅糧又命

同刑科都給事中郭瑾錄南京刑獄忱素樂易先是大
理卿胡槩為巡撫用法嚴忱一切治以簡易告訐者輒
不省或面訐忱公不及胡公忱笑曰胡卿敕旨在祛除
民害朝廷命我但云安撫軍民委寄正不同耳既久任
江南與吏民相習若家人父子每行村落屏去騶從與
農夫餉婦相對從容問所疾苦為之商畧處置其馭下
也雖卑官冗吏悉開心訪納遇長吏有能如况鍾及松
江知府趙豫常州知府莫愚同知趙泰輩則推心與咨

畫務盡其長故事無不舉嘗詣松江相視水利見嘉定
上海間沿江生茂草多淤流乃濬其上流使崑山顧浦
諸所水迅流駛下壅遂盡滌暇時以匹馬往來江上見
者不知其為巡撫厯宣德正統二十年間朝廷之委任
益專兩遭親喪皆起復視事忱以此益發舒見利害必
言言無不聽初欲減松江官田額依民田起科戶部郭
資胡濙奏其變亂成法請罪之宣宗切責資等忱嘗言
吳淞江畔有沙金柴場百五十頃水草茂盛蟲蠹多生

其中請募民開墾可以足課消蟲災又言丹徒丹陽
二縣田沒入江者賦尚未除國初蠲稅之家其田多併
於富室宜徵其租沒於江者除之則額不虧而貧富均
無錫官田賦白米太重請改征租米悉報可其因災荒
請蠲貸及所陳他利病無算小者用便宜行之無所顧
慮久之見財賦充溢益務廣大修葺廨舍學校先賢祠
墓橋梁道路及崇歸寺觀贈遺中朝官資餉過客無稍
吝惜胥吏漁蠹其中亦不甚訾省以故屢召人言九年

給事中李素等劾忱妄意變更專擅科斂忱上章自訴
帝以餘米既為功用置不問先是奸民尹崇禮欲撓忱
法奏忱不當多徵耗米請究問倉庫主事忱因罷前法
既而兩稅復通民無所賴咸稱不便忱乃奏按崇禮罪
舉行前法如故再以九載滿進戶部尚書尋以江南人
不得官戶部乃改工部仍巡撫景泰元年溧陽民彭守
學復訐忱如崇禮言戶部遂請遣御史李鑑等往諸郡
稽覈明年又以給事中金達言召忱還朝忱乃自陳臣

未任事之先諸郡稅糧無歲不逋自臣蒞任設法剗弊
節省浮費於是歲無逋租更積贏羨凡向之公用所須
科取諸民者悉于餘米隨時支給或振貸未還遇赦宥
免或未估時值低昂不一緣奉宣宗皇帝并太上皇敕
諭許臣便宜行事以此支用不復具聞致守學訐奏戶
部遣官追徵實臣出納不謹死有餘罪禮部尚書楊寧
言妄費罪乃在忱今估計餘直悉征於民間至有棄家
逃竄者乞將正統以前者免追詔許之召鑑等還既而

言官猶交章劾忱請正罪景帝素知忱賢而大臣亦多保持之但令致任然當時言理財者無出忱右其治以愛民為本濟農倉之設也雖與民為期約至時多不追取每歲徵收畢踰正月中旬輒下檄放糧曰此百姓納與朝廷贖數今還與百姓用之努力種朝廷田秋間又納朝廷稅也其所弛張變通皆可為後法諸府餘米數多至不可校公私饒足施及外郡景泰初江北大饑都御史王竑從忱貸米三萬石忱為計至來年麥熟以十

萬石畀之住機警錢鉅萬一屈指無遺算嘗陰為冊
記陰晴風雨或言某之江中遇風失米忱言是日江中
無風其人驚服有奸民故亂其舊案嘗之愧曰汝以某
時就我決事我為汝斷理敢相紿耶三殿重建詔徵牛
膠萬勛為綵繪用忱適赴京言庫貯牛皮歲久朽腐請
出煎膠俟歸市皮償庫土木之變當國諸議欲焚通州
倉絕寇資忱適議事至言倉米數百萬可充京軍一歲
餉今日往取則立盡何至遂付煨燼頃之詔趣造廬甲

數百萬忱計明厔浴鐵工多令且沃錫數日畢辦忱既
被劾帝命李敏代之敕無輕易忱法然自是戶部括所
積餘米為公賦儲備蕭然其後兵大饑道殣相望課逋
如故矣民益思忱不已即生祠處處祀之景泰四年十
月卒謚文襄況鍾等自有傳

贊曰宋禮陳瑄治河通運道為國家經久計生民被澤
無窮周忱治財賦民不擾而廩有餘羨此無他故殫公
心以體國而才力足以濟之誠異夫造端興事徼一時

之功智籠巧取為科斂之術者也然河渠之利世享其
成而忱之良法美意未幾而漸滅無餘民用重困豈非
成功之有迹者易以循而用法之因人者難其繼哉雖
然見小利而樂紛更不能不為當日之曉曉者惜也

明史卷一百五十三

欽定四庫全書

明史卷一百五十三考證

宋禮傳擢山西按察司僉事左遷戶部主事建文初薦授陝西按察僉事復坐事左遷刑部員外郎

臣方

煒按宋禮兩次左僉史不著其原委考傳維麟明書名臣實錄又考獻徵錄均不載歷官階級無憑考核謹識闕疑

宋禮傳歷八遞軍所民苦其勞

臣方煒按明代紀事

本末云于陸路置八遞運所每所用民丁三千車二百輛歲久民苦其役較史為詳謹識

宋禮傳乃用汶上老人白英策築堽城及戴村埧橫亘五里遏汶流使無南入洸而北歸海

臣方煒按獻

徵錄云乃築埧于戴村遏汶勿東流盡出于南旺史作使無南入洸北歸海河渠志則止云遏汶使無入洸彼此詳畧互異謹識

宋禮傳匯諸泉之水盡出汶上至南旺中分之為二道

南流接徐沛者十之四北流達臨清者十之六南旺
地勢高決其水南北皆注所謂水脊也因相地置閘
以時蓄洩自分水北至臨清地降九十尺置閘十有
七而達于衛南至沽頭地降百有十六尺置閘二十
一而達于淮

臣

方煒按河渠志云自南旺分水北

至臨清三百里為閘二十有一南至鎮口三百九十
里為閘二十有七又云禮用白英策築堤遏汶盡出
南旺南北置閘三十八而傳維鱗明書名臣實錄則

俱云禮修復會通河置十五閘諸說不符惟獻徵錄
與此傳同河渠志後一說當是總計之數與傳不甚
異謹說

宋禮傳二十旬而工成

臣方煒按二十旬而工成考

傅維鱗明書名臣實錄俱云工十旬與史異謹識

宋禮傳又奏濬沙河入馬常泊以益汶

臣方煒按河

渠志云禮又請疏東平東境沙河淤沙三里築堰障
之合馬常泊之流入會通濟運又于汶上東平濟寧

沛縣並湖地設水櫃陟門在漕河西者曰水櫃東者曰陟門櫃以蓄泉門以洩漲較史為詳謹識

宋禮傳以御史許堪言衛河水患命禮往經畫

臣方

煒按洩衛河至海豐傳維鱗明書名臣實錄俱云凡四百五十七里役夫三千工一旬此亦禮易於集事之証史云帝命俟秋成為之而不言工成謹識

宋禮傳弘治中主事王寵始請立祠詔祀之南旺湖上

臣方煒按名臣寔錄云正德七年始賜祠祀會通

河上與史互異謹識

宋禮傳

蘭若附

已坐事謫辦官事

臣

方焯按蘭芳之

謫傳維鱗明書亦祇云坐事謫為辦事吏不詳被謫之由史作辦事官又考辦事官不見職官志謹識闕疑

陳瑄傳父坐事戍遼陽

臣

方焯按陳聞戍遼陽獻徵

錄亦祇云坐舊累不詳所坐何事他書俱無可考無憑核定謹識

陳瑄傳瑄言嘉定瀕海地江流衝會海舟停泊于此無

高山大陵可依請于青浦築土山方百丈高三十餘

丈立堠表識既成賜名寶山

臣方煒按地理志嘉

定條下祇載寶山守禦千戶所不詳寶山所由名謹

識

陳瑄傳仍以瑄董漕運議造錢船二千餘艘

臣方煒

按河渠志瑄于湖廣江西造平底錢船三千艘明代

紀事本末同史作二千餘艘約畧之詞耳謹識

陳瑄傳瑄用故老言自淮安城西營家湖鑿渠二十里
為清江浦

臣方煒按河渠志云瑄鑿清江浦導水

由營家湖入鴨陳口達淮獻徵錄明代紀事本末俱
同傳云自淮安城西營家湖鑿渠二十里為清江浦
導河水入淮似不及志之明晰况清江浦自昔有之
而傳以為自營家湖鑿渠為清江浦似清江為新增
之浦竟屬營家湖之分派矣與志及他書俱不符謹

識

陳瑄傳又以呂梁洪險惡於西鑿一渠置二閘

臣方

煒按移風清江福興新庄四閘之名見河渠志惟傳所云呂梁洪二渠之二閘不見諸書謹識

陳瑄傳

陳熊附

坐事逮下詔獄

臣方煒按陳熊謫戍

海南史不詳坐事原委諸書俱無可考謹識

周忱傳永樂二年進士選庶吉士明年成祖擇其中二

十八人令進學文淵閣忱自陳年少乞預

臣

方煒

按靜志居詩話進士改庶常相傳自永樂甲申始是

科命解學士縉選得二十八人以應列宿忱自陳年少乞讀書中秘時人謂之族宿較史特詳謹識

周忱傳忱有經世才沉浮郎署二十年

臣方煒按今

獻備遺云忱預修永樂大典五經四書性理大全諸書史俱不載豈因忱以經濟著而畧其文學耶謹識

周忱傳時宣宗屢下詔減官田租忱與知府況鍾曲筭

累月

臣方煒按漢徐岳數術記遺了算之法一位

為一了字其了有三曲其下股之末內主一外主九

下次第一曲內主二外主八當第二曲內主三外主七其第三曲內主四外主六當了字之首則主五故首惟秉五腹背而兼此即曲算法也謹識

周忱傳減至七十二萬餘石

臣方煒按今獻備遺名

臣志鈔傳維鱗明書俱作蘇稅額二百九十餘萬石忱與况鍾疏減八十餘萬與史不符謹識闕疑

周忱傳忱與平江伯陳瑄議民運至淮安或瓜洲水次交兌漕運運抵通州

臣方煒按民運兌運之制食

貨志與此傳同但志祇作陳瑄不及周忱詳畧互異
耳謹識

周忱傳民間馬草歲運兩京勞費不訾忱請每束折銀
三分南京則輕齎即地買納 臣方煒按上文云馬
草歲運兩京下祇云南京即地買納而遺北京考傳
維鱗鄧元錫明書今獻備遺名臣志鈔俱云請北于
通州草場立官庫每束折銀三分史畧之謹識

周忱傳再以九載滿進戶部尚書尋以江西人不得官

戶部

臣方煒按江西人不得官戶部傳維鱗鄧元

錫明書今獻備遺名臣志鈔俱不載他書俱無可考

史不知何據謹識闕疑

明史卷一百五十三考證

欽定四庫全書

明史卷一百五十四

大學士張廷玉等奉 敕修

列傳第四十二

張輔

高士文
徐政

黃福

劉儵

呂毅
劉昱

陳洽

侯保
伍雲
馮陳
忠貴

李任等

李彬

柳升

崔聚
李宗昉
史安
潘樞
陳鏞

梁銘

王通

陳 陶 季 容
汀

張輔字文弼河澗王五長子也燕師起從父力戰為指
揮同知玉歿東昌輔嗣職從戰夾河藁城彰德靈壁皆
有功從入京師封信安伯祿千石予世券妹為帝妃邱
福朱能言輔父子功俱高不可以私親故薄其賞永樂
三年進封新城侯加祿三百石是時安南黎季犛弑其
主自稱太上皇立子蒼為帝其故王之孫陳天平自老
撾來奔季犛佯請歸國帝遣都督黃中以兵五千送之

前大理卿薛崑為輔李聲伏兵芹站殺天平崑亦死帝大怒命成國公朱能為征夷將軍輔為右副將軍帥豐城侯李彬等十八將軍兵八十萬會左副將軍西平侯沐晟分道進討兵部尚書劉儁贊軍事行部尚書黃福大理寺卿陳洽給饋餉四年七月能卒於軍輔代領其衆自憑祥進師度坡壘關望祭安南境內山川檄李聲二十罪進破隘留鷄陵二關道芹站走其伏兵抵新福晟軍亦自雲南至營於白鶴安南有東西二都依宣洮

施富良四江為險賊緣江南北岸立柵聚舟其中築城
於多邦隘城柵橋艦相連九百餘里兵衆七百萬欲據
險以老輔師輔自新福移軍三帶州造船圖進取會帝
聞朱能卒敕拜輔為將軍制詞以李文忠代開平王常
遇春為比且言乘冬月瘴癘未興宜及時滅賊十二月
輔軍次富良江北遣驃騎將軍朱榮破賊嘉林江遂與
晟合軍進攻多邦城佯欲他攻以懈賊令都督黃中等
將敢死士人持炬火銅角夜四鼓越重濠雲梯傳其城都

指揮蔡福先登士蟻附而上角鳴萬炬齊舉城下兵鼓
噪繼進遂入城賊驅象迎戰輔以畫獅蒙馬衝之翼以
神機火器象皆反走賊大潰斬其帥二人追至緄圓山
盡焚緣江木柵俘斬無算進克東都輯吏民撫降附來
歸者日以萬計遣別將李彬陳旭取西都又分軍破賊
援兵季聲焚宮室倉庫逃入海三江州縣皆望風降明
年春輔遣清遠伯王友等濟自注江悉破黨江困故萬
劫普賴諸寨斬首三萬七千餘級賊將胡杜聚舟盤灘

江輔使降將陳封襲走之盡得其舟遂定東潮浙江諸
府州尋擊破季犛舟師於木丸江斬首萬級擒其將校
百餘人溺死者無算追至膠水縣悶海口還軍築城賊
子闕令都督柳升守之已賊由富良江入輔與晟夾岸
迎戰升等以舟師橫擊大破之馘斬數萬江水為赤乘
勝窮追時天旱水淺賊棄舟陸走官軍至忽大雨水漲
遂畢渡五月至奇羅海口獲季犛及其子蒼並偽太子
諸王將相大臣等檻送京師安南平得府州四十八縣

一百八十戶三百十二萬求陳氏後不得遂設交趾布政司以其地內屬自唐之亡交趾淪於蠻服者四百餘年至是復入版圖帝為詔告天下諸王百官奉表稱賀六年夏輔振旅還京師再賜宴奉天殿帝為賊平安南歌進封英國公歲祿三千石予世券其年冬陳氏故臣簡定復叛命沐晟討之敗績於生厥江明年春復命輔佩征虜將軍印帥師往討時簡定已僭稱越上皇別立陳季擴為皇勢張甚輔就叱覽山伐木造舟招諒江北

諸避寇者復業遂進至慈廉州破喝門江克廣威州孔
目柵遇賊賊子闕賊舟六百餘保江東南岸輔帥陳旭
等以划船戰乘風縱火擒賊帥二百餘人盡得其舟追
至太平海口賊將鄧景異以三百艘迎敵復大破之於
是季擴自言陳氏後遣使求紹封輔曰向者遍索陳王
後不應今詐也吾奉命討賊不知其他遂遣朱榮蔡福
等以步騎先進輔帥舟師繼之自黃江至神投海會師
清化分道入磊江獲簡定於美良山中及其黨送京師

八年正月進擊賊餘黨斬數千人築京觀惟季擴未獲
帝留沐晟討之詔輔班師謁帝於興和命練兵宣府萬
全督運北征時陳季擴雖請降實無悛心乘輔歸攻剽
如故晟不能制交人苦中國約束又數為吏卒侵擾往
往起附賊乍服乍叛將帥益玩寇九年正月仍命輔與
沐晟協力進討輔至申軍令都督黃中數驕違節度詰
之不孫斬以徇將士惕息無敢不用命者其年七月破
賊帥鄧景異於月常江獲船百餘生擒偽元帥鄧宗稷

等又捕斬別部首數人以瘴癘息兵明年八月擊賊首
於神投海賊舟四百餘分三隊銳甚輔衝其中堅賊却
左右隊迭進官軍與相鉤連殊死戰自卯至巳大破賊
擒渠帥七十五人進軍又安府賊將降者相繼十一年
冬與晟會順州戰愛子江賊驅象前行輔戒士卒一矢
落象奴二矢射象鼻象奔還自蹂其衆裨將楊鴻韓廣
薛聚等乘勢繼進矢落如雨賊大敗擒其帥五十六人
追至愛母江盡降其衆明年正月進至政平州聞賊屯

遲蠻昆蒲諸柵遂引兵往懸崖側徑騎不得進輔與將
校徒步行山箐中夜四鼓抵其巢悉擒鄧景異阮鎔等
季擴走老撾遣指揮師祐以兵索之破其三關遂縛季
擴及其孥送京師賊平承制以賊所取占城地設升華
思義四州增置衛所官其降人留軍守之而還十三年
春至京旋命為交趾總兵官往鎮而餘寇陳月湖等復
作亂輔悉討平之十四年冬召還輔凡四至交趾前後
建置郡邑及增設驛傳遞運規畫甚備交人所畏惟輔

輔還一年而黎利反累遣將討之無功至宣德時柳升
敗沒王通與賊盟倉卒引還廷議棄交趾輔爭之不能
得也仁宗即位掌中軍都督府事進太師並支二俸尋
命輔所授太師俸於北京倉支給時百官俸米皆給於
南京此蓋特恩云成祖喪滿二十七日帝素冠麻衣以
朝而羣臣皆已從吉惟輔與學士楊士奇服如帝帝歎
曰輔武臣也而知禮過六卿益見親重尋命知經筵事
監修實錄宣德元年漢王高煦謀反誘諸功臣為內應

潛遣人夜至輔所輔執之以聞盡得其反狀因請將兵
擊之帝決策親征命輔扈行事平加祿三百石輔威名
益盛而久握兵四年都御史顧佐請保全功臣詔輔解
府務朝夕侍左右謀畫軍國重事進階光祿大夫左柱
國朝朔望英宗即位加號翊運佐理知經筵監修實錄
如故輔雄毅方嚴治軍整肅屹如山岳三定交南威名
聞海外厯事四朝連姻帝室而小心敬慎與蹇夏三楊
同心輔政二十餘年海內宴然輔有力焉王振擅權文

武大臣望塵頓首惟輔與抗禮額森入犯振導英宗親
征輔從行不使預軍攻輔老矣默默不敢言至土木死
於難年七十五追封定興王謚忠烈子懋九歲嗣公憲
宗閱騎射西苑懋三發連中賜金帶厯掌營府累加至
太師嘗上言防邊事宜諫止發京營兵作圓通寺弘治
中御史李興彭程下獄懋論救復請罷作真武觀免織
造召還中官董織者武宗即位與羣小狎遊懋率文武
大臣諫其言皆切直然性豪侈又頗腹削軍士屢為言

者所糾嗣公凡六十六年握兵柄者四十年尊寵為勲
臣冠正德十年卒年亦七十五贈寧陽王謚恭靖萬曆
十一年與朱希忠竝削王號孫崙嗣傳爵至世澤流寇
陷京師遇害初輔之定交趾也先後百餘戰其從征死
事最著者有高士文徐政士文咸陽人洪武中以小校
從征雲南及金山有功為燕山左護衛百戶質直剛果
善騎射從成祖起兵累官都督僉事從張輔征交趾黎
季犛既擒餘黨竄山谷中出沒為寇五年八月士文帥

所部敗之廣源進圍其寨晝夜急攻垂破賊突走士文
追與戰中飛石死所部復追賊賊失巢潰散遂為指揮
程瑒所滅朝廷念士文功追封建平伯令其子福嗣祿
千三百石予世券三傳至孫霽無子以義子為嗣事覺
爵除徐政儀真人建文時為楊州衛副千戶以城降成
祖累遷都指揮同知從征交趾奪船於三帶江以濟大
軍拔西都戰鹹子關皆有功陳季擴反盤灘地最要衝
張輔遣政守之七年八月賊黨鄧景異來攻與戰飛鎗

貫脇猶督兵力戰竟敗賊賊退腹潰而死

黃福字如錫昌邑人洪武中由太學生歷金吾前衛經歷上書論國家大計太祖奇之超拜工部右侍郎建文時深見倚任成祖列姦黨二十九人福與焉成祖入京師福迎附李景隆指福姦黨福曰臣固應死但目為姦黨則臣心未服帝置不問復其官未幾拜工部尚書永樂三年陳瑛劾福不恤工匠改北京行部尚書明年坐事逮下詔獄謫充為事官已復職督安南軍餉安南既

平郡縣其地命福以尚書掌布政按察二司事時遠方
初定軍旅未息庶務繁劇福隨事制宜咸有條理上疏
言交趾賦稅輕重不一請酌定務從輕省又請循瀘江
北岸至欽州設衛所置驛站以便往來開中積鹽使商
賈輸粟以廣軍儲官吏俸廩倉粟不足則給以公田又
言廣西民餽運陸路艱險宜令廣東海運二十萬石以
給皆報可於是編氓籍定賦稅興學校置官師數名父
老宣諭德意戒屬吏毋苛擾一切鎮之以靜上下帖然

時羣臣以細故謫交趾者衆福咸知拯恤甄其賢者與共事由是至者如歸鎮守中官馬騏怙寵虐民福數裁抑之騏誣福有異志帝察其妄不問仁宗即位召還命兼詹事輔太子福在交趾凡十九年及還交人扶攜走送號泣不忍別福還交趾賊遂劇訖不能靖仁宗崩督獻陵工宣德元年馬騏激交趾復叛時陳洽以兵部尚書代福累奏乞福還撫交趾會福奉使南京召赴闕敕曰卿惠愛交人久交人思卿其為朕再行仍以工部尚

書兼詹事領二司事比至柳升敗死福走還至雞陵關
為賊所執欲自殺賊羅拜下泣曰公交民父母也公不
去我曹不至此力持之黎利聞之曰中國遣官吏治交
趾使人人如黃尚書我豈得反哉遣人馳往守護饋白
金餼糧肩輿送出境至龍州盡取所遺歸之官還為行
在工部尚書四年與平江伯董漕事議令江西湖廣浙
江及江南北諸郡事量地遠近轉粟於淮徐臨清而令
軍士接運至北京民大稱便五年陳足兵食省役之要

其言足食謂永樂間雖營建北京南討交趾北征沙漠
資用未嘗乏比國無大費而歲用僅給即不幸有水旱
征調將何以濟請役操備營繕軍士十萬人於濟寧以
北衛輝真定以東緣河屯種初年自食次年人收五石
三年收倍之既省京倉口糧六十萬石又省本衛月糧
百二十萬石歲可得二百八十萬石帝善之下行在戶
兵二部議郭資張本言緣河屯田實便請先以五萬頃
為率發附近居民五萬人墾之但山東近年旱饑流徙

初復衛卒多力役宜先遣官行視田以俟開墾帝從之
命吏部郎中趙新等經理屯田福總其事既而有言軍
民各有常業若復分田役益勞擾事竟不行改戶部尚
書七年帝於宮中覽福漕事便宜疏出以示楊士奇曰
福言智慮深遠六卿中誰倫比者對曰福受知太祖正
直明果一志國家永樂初建北京行部綏輯凋瘵及使
交趾總藩憲具有成績誠六卿所不及福年七十矣諸
後進少年高坐公堂理政事福四朝舊人乃朝暮奔走

勞悴殊非國家優老敬賢之道帝曰非汝不聞此言士
奇又曰南京根本重地先帝以儲宮監國福老成忠直
緩急可倚帝曰然明日改福官南京明年兼掌南京兵
部英宗即位加少保參贊北京守備襄城伯李隆機務
留都文臣參機務自福始隆用福言政肅民安正統五
年正月卒年七十八福丰儀修整不妄言笑歷事六朝
多所建白公正廉恕素孚於人當官不為赫赫名事微
細無不謹憂國忘家老而彌篤自奉甚約妻子僅給衣

食所得俸錄惟待賓客周匱乏而已初成祖手疏大臣
十人命解縉評之惟於福曰秉心易直確乎有守無少
貶福參贊南京時嘗坐李隆側士奇寄聲曰豈有孤鄉
而旁坐者福曰焉有少保而贊守備者邪卒不變然隆
待福甚恭公退即推福上坐福亦不辭士奇之省墓也
道南京聞福疾往候之福驚曰公輔幼主一日不可去
左右奈何遠出士奇深服其言兵部侍郎徐琦使安南
回福與相見石城門外或指福問安南來者曰汝識此

大人否對曰南交草木亦知公名安得不識福卒贈謚
不及士論頗不平成化初始贈太保謚忠宣

劉儁字子士江陵人洪武十八年進士除兵部主事歷
郎中遇事善剖決為帝所器二十八年擢右侍郎建文
時為侍中成祖即位進尚書永樂四年大征安南以儁
參贊軍務儁為人縝密勤敏在軍佐畫籌策有功還受
厚賚未幾簡定復叛儁再出參贊沐晟軍務六年冬晟
與簡定戰生厥江敗績儁行至大安海口颶風作揚沙

畫晦且戰且行為賊所圍自經死洪熙元年三月帝以
儁陷賊不屈有司不言未加褒卹敕責禮官乃賜祭贈
太子少傅謚節愍官其子奎給事中與儁同死者呂毅
劉昱毅項城人以濟南衛百戶從成祖渡江積功至都
督僉事與同官黃中充左右副將軍佐征南將軍韓觀
鎮廣西尋與中將兵送故安南王孫陳天平歸國至芹
站天平被劫去坐奪官帝薄毅罪起為鷹揚將軍從張
輔討季犛有功掌交趾都司事至是與賊戰深入陷陣

死昱武城人自吏科給事中遷左通政出為河南參政
改交趾嚴肅有治材吏民畏憚軍敗亦死之

陳洽字叔遠武進人好古力學與兄濟弟浚竝有名洪
武中以善書薦授兵科給事中嘗奉命閱軍一過輒識
之有再至者輒叱去帝嘉其能賜金織衣父戍五開歿
洽奔喪會蠻叛道梗冒險間行負父骨以歸建文中以
茹瑺薦起文選郎中成祖即位擢吏部右侍郎改大理
卿安南兵起命洽赴廣西與韓觀選士卒從征及大軍

出遂命贊軍務主饋餉安南平轉吏部左侍郎是時黃福掌布按二司事專務寬大拊循其民洽甄拔才能振以風紀覈將士功罪建置土官經理兵食剖決如流還朝命兼署禮部工部事七年復參張輔軍討簡定平之還從帝北征與輔練兵塞外九年復與輔往交趾討陳季擴居五年進兵部尚書復留贊李彬軍事仁宗召黃福還以洽掌布按二司仍參軍務中官馬騏貪暴洽不能制反者四起黎利尤桀黠而榮昌伯陳智都督方政

不相能寇勢日張洽上疏言賊雖乞降內懷詭詐黨羽漸盛將不可制乞諭諸將速滅賊毋為所餌宣宗降敕切責智等令進兵復敗於茶籠州帝乃削智政官爵命成山侯王通佩征夷將軍印往討洽仍贊其軍宣德元年九月通至交趾十一月進師應平次寧橋洽與諸將言地險惡恐有伏宜駐師覘賊通不聽麾兵徑渡陷泥淖中伏發官軍大敗洽躍馬入賊陣創甚墜馬左右欲扶還洽張目叱曰吾為國大臣食祿四十年報國在今

日義不苟生揮刀殺賊數人自刎死事聞帝歎曰大臣
以身殉國一代幾人贈少保謚節愍官其子樞刑科給
事中自黎利反用兵三四年將吏先後死者甚衆侯保
贊皇人由國子生歷知襄城贛榆博興三縣有善政交
趾初設府縣擇人撫綏以保知交州府遷右叅政永樂
十八年黎利反保以黃江要害築堡守之賊至力拒數
月出戰不勝死馮貴武陵人舉進士為兵科給事中從
張輔征交征督兵餉累遷左叅政涖事明敏善撫流亡

土兵二千人驍果善戰貴撫以恩意數擊賊有功中官馬騏盡奪之黎利反貴以羸卒數百禦賊於瑰縣力屈而死仁宗時尚書黃福言狀贈貴左布政使保右布政使然貴嘗言交趾產金遂命以參議提督金場時論非之伍雲定遠人以荊州護衛指揮同知從征交趾破坡壘隘留多邦城拔東西二都皆有功賊平調昌江衛仁宗初隨方政討黎利於茶籠深入陷陣死陳忠臨淮人初為寬河副千戶以靖難功積官指揮同知坐事戍廣

西從征交趾自箇招市舁小舟入江刦黎季犛水寨破之攻多邦城先登論功還故官調交州左衛屢與賊戰有功進都指揮同知黎利寇清化忠戰死仁宗憫之與雲皆優恤如制李任永康人以燕山衛指揮僉事從成祖起兵累功為都指揮同知宣德元年從征交趾守昌江黎利以昌江為官軍往來要路悉力攻之時都督蔡福為賊所獲逼令招任降任於城上罵福曰汝為大將不能殺賊反為賊用狗彘不食汝餘發礮擊之賊擁福

去大集兵象飛車衝梯薄城環攻任與指揮顧福帥精
騎出城掩擊燒其攻具賊又築土山臨射城中鑿地道
潛入城任福隨方禦之死守九月餘前後三十戰賊聞
征夷將軍柳升兵將至益兵來攻二年四月城陷任福
猶帥死士三戰三敗賊賊驅象大至不能支皆自剄死
內官馮智指揮劉順俱自經城中軍民婦女不屈死者
數千人劉子輔廬陵人由國子生擢監察御史巡按浙
江性廉平浙人德之按察使周新不苟許與獨稱子輔

賢遷廣東按察使坐累左遷諒江知府善撫循其民黎
利反子輔與守將集兵民死守亦九閱月與昌江先後
同陷子輔曰吾義不污賊刃即自縊死一子一妾皆死
何忠字廷臣江陵人由進士為監察御史廉慎人莫敢
干以私永樂中三殿災言事忤旨出為政平知州民安
其政寧橋之敗王通詭與賊和而請濟師於朝為賊所
遮不得達賊遣使奉表入謝通乃遣忠及副千戶桂勝
與偕行以奏還土地為辭陰令請兵至昌江內官徐訓

泄其謀賊遂拘忠勝臨以白刃二人瞋目怒罵不屈竝
忠子皆被害徐麒桂林中衛指揮使與南寧千戶蔡顯
守邱溫時賊勢已熾將更多棄城遁邱溫被圍麒與顯
猶帥疲卒固守城陷皆死無一降者易先相陰人以國
子生受諒山知府有善政歲滿還朝郡人乞留詔進秩
三品還任賊破諒山先自縊死周安以指揮僉事守備
乂安黎利勢張都督蔡福以芻糧將盡退就東關既行
千戶包宣以其衆詣賊降安等至富良江為賊所虜俱

陷賊賊逼蔡福詣諸城說降安憤甚潛與衆謀俟官軍至為內應包宣覺之以告利利收安將殺之安曰吾天朝臣子豈死賊手與指揮陳麟躍起奪賊刀殺數人皆自刎死所部九千餘人悉被殺交趾布政使弋謙以任等十二人死事聞宣宗歎息贈任都督同知福順麒都指揮同知安指揮同知顯指揮僉事勝正千戶竝令子孫承襲子輔先布政司參政忠府同知智太監竝予誥賜祭惟麟嘗與朱廣開門納賊故贈恤不及已而黎利

稱臣歸蔡福朱廣等六人盡棄市籍其家

李彬字質文鳳陽人父信從太祖渡江積功為濟川衛指揮僉事彬嗣職從潁國公傅友德出塞斬獲多還與築諸邊城成祖起兵彬歸附為前鋒轉戰有功累遷右軍都督僉事永樂元年四月以邱福議封豐城侯祿千石予世券明年襄城伯李濬討永新叛寇命彬帥師策應未至寇平命以所統鎮廣東四年召還捕南陽罕君山寇其年七月以左參將賁征夷副將軍印授沐晟進

討安南十二月彬及雲陽伯陳旭破安南西都又大敗賊於木九江安南平論功與旭皆以臨敵稽緩不益封加祿五百石尋充總兵官備倭海上移兵討擒長沙賊李汝良又帥浙閩兵捕海寇十年命往甘肅與西寧候宋琥經畧降酋彬與柳升嚴兵境上而令土官李英防野馬川涼州酋婁達哈叛都指揮何銘戰死英追躡盡俘其衆婁達哈走赤斤蒙古帝欲發兵彬言道遠餉難繼宜緩圖之明年代琥鎮甘肅赤斤蒙古縛婁達哈以

獻帝嘉彬功賜賚甚厚十二年從北征領右哨破敵於和實袞追奔至圖拉河師還受上賞移鎮陝西十五年二月命佩征夷將軍印鎮交趾至則破擒陸那縣賊阮貞遣都督朱廣等平順州及北畫諸寨明年清化府土巡檢黎利反彬遣廣討破之利遁去十七年遣都督同知方政襲利於可藍柵獲其將軍阮箇立等利走老撾師還復出為寇都指揮黃誠擊走之以暑雨旋師當是時交人反者四起彬遣諸將分道往討方政討車綿子

等於嘉興鄭公証於南策丁宗老於大灣朱廣討譚興
邦等於別部都指揮徐諤討范軟於俄樂指揮陳原瑰
討陳直誠於惡江都指揮王忠討楊恭於峽山皆先後
報捷而賊勢尤劇者彬輒自將往擊潘僚者又安土知
府也為中官馬騏所虐反衙儀彬擊敗之追至玉麻州
擒其酋進焚賊柵僚竄老撾彬遣都指揮師祐帥師往
僚以老撾兵迎戰破之農巴林悉降其衆范玉者塗山
寺僧也反東潮州彬往討敗之江中玉脫走追獲之東

潮而鄭公証之黨黎姪復起都指揮陳忠等累敗之於
小黃江彬自將追捕至鎮蠻盡縛其衆於是諸賊畧平
惟黎利數出沒聚衆磊江屢為徐諤方政所敗復遁去
十九年彬以餽運不繼請令官軍與上軍參錯屯田竝
酌屯守征行多寡之數以聞帝從之將發兵入老撾索
黎利老撾懼請自捕以獻會彬疾作而罷明年正月卒
繼之者孟瑛陳智李安方政皆不能討王通代鎮賊勢
益盛交趾遂不可守彬卒贈茂國公謚剛毅子賢嗣宣

德三年從出塞還修永寧隆慶諸城正統初鎮大同尋
守備南京景泰二年卒贈豐國公謚忠憲子勇嗣再傳
至孫旻正德中鎮貴州擒思南石阡流賊平武定諸蠻
有功加太子太傅嘉靖初鎮湖廣有威惠楚人安之徙
兩廣武定侯郭勛典京營以罪罷世宗以旻遠鎮無內
黨召代之尋坐事罷卒謚武襄無子從子熙嗣出鎮湖
廣楚世子獄株連甚衆熙言於御史平反二百餘人討
平沅州麻陽叛蠻卒無子從子儒嗣傳至孫承祚天啓

時附魏忠賢請設海外督理內臣又請予忠賢九錫崇
禎初奪爵戍邊子開先嗣為伯都城陷遇害

柳升懷寧人襲父職為燕山護衛百戶大小二十餘戰
累遷左軍都督僉事永樂初從張輔征交趾破賊魯江
斬其帥阮子仁等守鹹子關賊入富良江舟亘十餘里
截江立寨陸兵亦數萬人輔將步騎升將水軍夾攻大
敗之獲偽尚書阮希周等又敗賊於奇羅海口得舟三
百部卒得季聲及其子澄升賫露布獻俘被賞賚師還

封安遠伯祿千石子世恭七年同陳瑄帥舟師巡海至
青州海中大破倭追至金州白山島而還明年從北征
至回曲津將神機火器為前鋒大敗呵魯台進封侯加
祿五百石仍世伯爵出鎮寧夏討斬叛將馮達蘭特穆
爾等召還總京營兵十二年復從北征將大營兵戰和
拉和錫衮以火器破敵十八年蒲臺妖婦唐賽兒反命
升與都指揮劉忠將京軍往勦圍其寨升自以大將意
輕賊賊乞降信之夜為所襲忠中流矢死賽兒遁去及

明始覺追獲其黨百餘人都指揮衛青刀戰解安邱圍
升忌其功摧辱之徵下獄已得釋二十年復從北征將
中軍破烏梁海於奇拉爾河予世侯帝五出塞升皆從
數有功寵待在列侯右仁宗即位命掌右府加太子太
傅宣德元年冬成山侯王通征黎剌敗聞命升為征虜
副將軍充總兵官保定侯梁銘為左副總兵都督崔聚
為參將尚書李慶贊軍務帥步騎七萬會黔國公沐晟
往討時賊勢已盛道路梗絕朝廷久不得交趾奏報二

年六月有軍丁李茂先者三人間道走京師言昌江被圍急帝授三人百戶敕升急進援而昌江已於四月陷九月升始入隘留闕利偽為國上人書請立陳氏後升不啓封以聞賊緣途據險列柵官軍速破之抵鎮夷關升以賊屢敗易之時李慶梁銘皆病甚郎中史安主事陳鏞言於慶曰柳將軍辭色皆驕驕者兵家所忌賊或示弱以誘我未可知也防賊設伏璽書告誡甚切公宜力言之慶強起告升升不為意至倒馬坡與百餘騎先

馳度橋橋遽壞後隊不得進賊伏四起升陷泥淖中中
鏢死其日銘病卒明日慶亦卒又明日崔聚帥軍至昌
江賊來益衆官軍殊死鬪賊驅象大戰陣亂賊大呼降
者不死官軍或死或走無降者全軍盡沒史安陳鏞及
李宗昉潘裡皆死之崔聚懷遠人從成祖起兵八年從
北征敗敵於廣漠成洪熙元年累遷左軍都督僉事至
是力戰被執賊百計降之終不屈死升質直寬和善撫
士卒勇而寡謀遂及於敗升敗沐晟師不得進亦引還

王通孤軍援絕遂棄交趾朝議以升喪師不令子溥襲爵久之乃許正統十二年贈升融國公謚襄愍溥初掌中府出鎮廣西庶慎然無將畧承山雲後不能守成法過於寬弛猺獞相煽為亂溥先後討斬大藤峽賊渠破柳州思思諸蠻寨而賊滋蔓如故景泰初兵事亟召掌右府總神機營事定復出鎮天順初召還防宣府大同累進太傅陝西有警命佩平虜大將軍印往禦敵再入涼州溥閉壁不出敵飽掠去躡取數十級報捷被劾落

太傅間住尋復起掌神機營卒謚武肅孫景嗣景子文
文子珣凡三世皆鎮兩廣有平蠻功嘉靖十九年命珣
佩征夷副將軍印征安南莫登庸登庸乞降加太子太
傅又以討瓊州黎賊功加少保卒贈太保謚武襄傳至明
亡爵絕史安字志靜豐城人庶重好學由進士歷官
儀制司郎中陳鏞字叔振錢塘人由庶吉士授祠祭司
主事楊士奇稱其清介端確表裏一出於正李宗昉不
知何許人亦以主事從潘裡郵人以後軍都事從嘗勸

升持重廣偵探引芹站寧橋事為戒升不聽軍敗格闕
死

梁銘汝陽人以燕山前衛百戶從仁宗守北平李景隆
圍城戰甚力積功至後軍都督僉事侍仁宗監國永樂
八年坐事下獄十九年赦復職副都督胡原捕倭廣東
仁宗即位進都督同知以參將佩征西將軍印同都督
同知陳懷鎮寧夏追論守城功封保定伯祿千石予世
券宣德初御史石璞劾其貪黷下獄當奪爵宥之副柳

升征交趾升敗銘病卒銘勇敢善戰能得士卒心既死
崔聚獨以衆入全軍遂覆于瑤嗣正統末充副總兵討
福建盜鄧茂七擊斬餘賊於九龍山班師而賊黨復作
謫充為事官從石亨立功復爵景泰元年拜平蠻將軍
代王驥討貴州苗其冬分四道進攻大敗之斬首七千
有奇破寨五百明年自沅州進兵與都督方瑛破賊於
興澤又大破之香鑪山俘偽王韋同烈等擒斬數千人
分兵攻都勻草塘諸苗悉震恐降師還苗復叛瑤復與

璘討平之論功進侯益祿五百石四年討平湖廣清浪
叛苗天順元年出鎮陝西破敵涼州又破敵靖虜堡召
還理左府事成化初卒贈蠡國公謚襄靖瑄天資平恕
數總兵柄未嘗妄殺一人子弟從征以功授官輒辭不
受人以為賢傳爵至世勲崇禎初提督京營京師陷遇
害

王通咸寧人金鄉侯真子也嗣父官為都指揮使將父
兵轉戰有功累進都督僉事復以父死事故封武義伯

祿千石予世券永樂七年董營長陵十一年進封成山侯加祿二百石明年從北征領右掖二十年從出塞以大軍殿連出塞竝領右掖仁宗即位命掌後府加太子太保時交趾總兵官豐城侯李彬已前卒榮昌伯陳智都督方政以參將代鎮不協黎利益張數破郡邑殺將吏智出兵數敗宣宗削智爵而命通佩征夷將軍印帥師往討黎利弟善攻交州城都督陳濬等擊却之會通至分道出擊參將馬瑛破賊於石室縣通引軍與瑛合

至應平之寧橋中伏軍大潰死者二三萬人尚書陳洽
與焉通中傷還交州利在乂安聞之自將精兵圍東關
通氣沮陰遣人許為利乞封而檄清化迤南地歸利按
察使楊時習執不可通厲聲叱之清化守羅通亦不肯
棄城與指揮打忠堅守朝廷遣柳升等助通未至二年
二月利攻城通以勁兵五千出不意擣賊營破之斬其
司空丁禮以下萬餘級利惶懼欲走諸將請乘勝急擊
通猶豫三日不出賊勢復振樹柵掘濠塹四出攻掠分

兵陷昌江諒江而圍交益急通斂兵不出利乞和通以
聞會柳升戰歿沐晟師至水尾縣不得進通益懼更啗
利和為利馳上謝罪表其年十月大集官吏軍民出城
立壇與利盟約退師因宴利遺利錦綺利亦以重寶為
謝十二月通令太監山壽與陳智等由水路還欽州而
自帥步騎還廣西至南寧始以聞會廷議厭兵遂棄交
趾交趾內屬者二十餘年前後用兵數十萬餽餉至百
餘萬轉輸之費不與焉至是棄去官吏軍民還者八萬


六十餘人其陷於賊及為賊所戮者不可勝計而土官嚮義者陶季容陳汀之屬乃徃徃自拔來歸明年通還京羣臣交劾論死繫獄奪券籍其家正統四年特釋為民景帝立起都督僉事守京城禦額森有功進同知守天壽山還其家產景泰三年卒天順元年詔通子琮嗣成山伯琮子鏞成化時賜原券傳爵至明亡陶季容者世為水尾土官交趾平以為土知縣歷歸化知州遷宣化府同知守北開堡宣德元年遣所部阮執先等追賊

至清波縣為所獲既而遣執先還招季容脅以兵不為
動宣宗聞之擢宣化知府降敕獎勞賊復遣人誘季容
季容執以送沐晟而導官軍敗賊於水尾王通棄交趾
季容率官屬入朝陳汀古雷縣千夫長數從方政擊賊
有功政信倚之王通棄地汀北行為賊所得授以官令
守交州東關汀挈其家九十餘人從間道走賊追之家
屬盡陷汀獨身入欽州帝嘉其義以為指揮原賚之他
若土官阮世寧阮公庭皆不願從利率所部來歸乞居

龍州陳州之地帝命加意撫卹資糧器用官給之

贊曰成祖因季犛篡立興師問罪以彰天討求陳氏後
不得從而郡縣其地得取亂侮亡之道矣蠻疆險遠易
動難馴數年之間叛者數起柳升以輕敵喪師王通以
畏怯棄地雖黃福惠愛在交叛人心折而大勢已去再
至無功宣宗用老成謀國之言廓然置之度外良以其
得不為益失不為損事勢所不必爭非獨憚於勞民而
絀於籌餉也嘗考黃福與張輔書言惡本未盡除守兵

不足用馭之有道可以漸安守之無法不免再變權交
事之始終蓋惜張輔之不得為滇南之沐氏也



明史卷一百五十四

欽定四庫全書

明史卷一百五十四考證

張輔傳命成國公朱能為征夷將軍輔為右副將軍帥

豐城侯李彬等十八將軍

臣章宗瀛按十八將軍

諸書俱不詳載惟明代紀事本末云以成國公朱能

為大將軍西平侯沐晟新城侯張輔為左右副將軍

豐城侯李彬雲陽伯陳旭為左右叅將大將軍率右

副將軍右叅將及清遠伯王友仁機將軍程寬朱貴

遊擊將軍毛八丹朱廣王恕等橫海將軍魯麟王玉

商鵬鷹揚將軍呂毅朱吳江浩方政驃騎將軍朱榮

金銘吳旺劉劄出等二十五將軍史畧其名謹附識

張輔傳賊緣江南北岸立柵聚舟其中築城于多邦隘

城柵橋艦相連九百餘里兵衆七百萬 臣章宗瀛

按七百萬明代紀事本末作二百萬與史互異謹識

張輔傳斬其帥二人 臣章宗瀛按賊帥二人名梁民

獻伯樂見明代紀事本末史畧其名謹識

張輔傳悉破籌江因枚萬劫普賴寨

臣章宗瀛按明

代紀事本末云張輔沐晟等襲賊籌江棚大破之又
追敗賊于萬劫江普賴山史槩以寨名之當屬統稱

耳謹識

張輔傳擒其將校百餘人

臣章宗瀛按擒其將明代

紀事本末作殺其將阮子仁黃老岡百餘人獻徵錄
作擒其黨黃老岡彤文傑馮宗寔莫鉄范鞋阮利百
餘人史畧其名謹識

張輔傳獲李聲及其子蒼並偽太子 臣章宗瀛按偽

太子名芮見明代紀事本末識大錄謹識

張輔傳安南平得府州四十八縣一百八十 臣章宗

瀛按明代紀事本末云分十七府曰交州北江諒江

三江建平新安建昌奉化清化宣化太原鎮蠻諒山

新平義安順化升華四十七州一百五十七縣衛十

一所三名臣志鈔識大錄弇州史料所紀府州縣之

目並同第不載府名耳安南傳則作十五府分轄三

十六州一百八十一縣府名無宣化太原升華有演
州而宣化太原與嘉興歸化廣威則作五直隸州分
轄二十九縣又陶季容為宣化府同知則宣化固府
也史作得府州四十八縣一百八十與諸書俱不符
惟名臣寔錄今獻備遺獻徵錄均與史同傳維鱗明
書則作得郡縣一百三十四尤混淆無別謹識

張輔傳戶三百十二萬 臣章宗瀛按戶三百十二萬

弇州史料傳維鱗明書均與史同明代紀事本末云

安撫人民三百二十萬獲蠻人二百八萬七千五百
安南傳畧同惟二十萬作十二萬當屬字之顛倒耳

謹識

張輔傳遂設交趾布政司以其地內屬

臣章宗瀛按

安傳輔上交趾地圖東西一千七百六十里南北二
千八百里謹識

張輔傳其年冬陳氏故臣簡定復叛

臣章宗瀛按簡

定稱曰南王僭號大越改元興慶雜見于弇州史料

明代紀事本末名臣志鈔獻徵錄安南傳諸書後定
自稱上皇立季擴為大越皇帝改元重光史并為一
敘次頗為不清謹識

張輔傳時簡定已僭稱越上皇別立陳季擴為皇

臣

章宗瀛按明代紀事本末云季擴蠻人自稱陳氏後
弇州史料識大錄俱以為簡定從子史畧之謹識

張輔傳輔帥陳旭等以剗船戰乘風縱火擒賊帥二百

餘人

臣

章宗瀛按賊帥明代紀事本末作潘坻等

二百餘人史畧其名謹識

張輔傳擒其帥五十六人

臣章宗瀛按擒其帥明代

紀事本末云斬賊將阮山擒偽將潘經等數十人史

畧其名謹識

張輔傳前後建置郡邑及增設驛傳遞運規畫甚備

臣章宗瀛按增設驛傳遞運考獻徵載輔言自欽州

天涯驛經猫尾港至涌淪佛淘從萬寧縣抵交趾多

由水道陸行止二百九十一里宜置水馬驛傳以便

往來于是命防城等處設九水驛龍門等處設二馬
驛寧越等處設七遞運所佛岡設巡檢司改交趾嘉
林縣為嘉林馬驛交州府瀘江欽州天保俱為水馬
驛廣西橫州州門水驛隸南寧府皆如輶所請云云
較史為詳謹識

張輔傳子懋九歲嗣公

臣 漳宗灝按張懋懋爵之事

考傅維麟明書云長子忠勳衛病也庶子傑仁嗣弟
文安伯輓太平侯軌言傑本忠婢子不可嗣景泰五

年庶子懋嗣公侯簿同但簿云張輔庶男張懋見年
十一歲應襲奏奉欽依張忠既殘疾其子未歷不明
著張懋襲爵史俱畧之又考公侯簿作本年明書作
五年公侯簿作十一歲史作九歲互有異同謹識開
疑

張轉傳諫止發京營兵作圓通寺

臣章宗瀛按懋之

諫發京營兵作圓通寺及請罷作真武觀考諸書均
不載謹識

黃通傳改北京行部尚書

臣

章宗瀛按行部尚書今

聖備通作刑部尚書名臣寔錄鄧元錫明書均與史
同考職官志永樂元年置北京行部尚書二人隔之
行官正當此時史文行部似為不誤今獻備遺或以
為近而訛耳謹識

黃通傳坐事逮下詔獄

臣

章宗瀛按黃福下獄被謫

史不詳坐事原委今獻備遺名臣寔錄鄧元錫明書
俱無下獄被謫之文他書亦無可考謹識

黃福傳叅贊南京守備襄城伯李隆機務

臣章宗瀛

按名臣寔錄云福每事先籌定付襄城伯襄城伯亦敬信福比視事皆襄城伯處分福不出一語或以為言福曰汝見守備何嘗一事錯鄧元錫明書畧同史以隆用福言一語緊之謹識

黃福傳歷事六朝多所建白

臣章宗瀛按名臣寔錄時

以福議復設提學憲臣史畧之謹識

黃福傳所得俸祿惟待賓客周匱乏而已

臣章宗瀛

按名臣實錄鄧元錫明書俱云俸賜均贍姻族屬續
之日室無百緡與史稱福之廉合謹識

陳洽傳中官馬騏貪暴

臣

章宗瀛按馬騏貪暴考明

紀事本末云騏定歲貢扇萬柄翠羽萬箇騏墨而殘
交人苦之較史為詳

陳洽傳與諸將言地險惡恐有伏宜駐師覘賊

臣章

宗瀛按史云駐師覘賊今獻備遺明紀事本末云請
駐師石室縣之沙河以覘賊弱強語較明暢謹識

陳洽傳

主貴附

土兵二千人驍果善戰貴撫以恩意數

擊賊有功

臣章宗瀛按二千人傳維鱗明書及明

紀事本末俱作二萬人與史異謹識

陳洽傳

陳忠附

坐事戍廣西

臣章宗瀛按陳忠戍廣

西史不詳坐事原委諸書俱無可考無憑核訂謹識

闕疑

陳洽傳

劉子輔附

坐累左遷諒江知府

臣章宗瀛按

子輔左遷傳維鱗明書與史同不詳坐累原委他書

無可考謹識

陳洽傳劉子輔附

黎利反子輔與守將集兵民死守

臣章宗瀛按明紀事本末云子輔死軍民俱力戰無

一人降者史畧之謹識

陳洽傳何忠附

遂拘忠勝臨以白刃二人瞋目怒罵不

屈並忠子皆被害

臣章宗瀛按傳維鱗明書云且

鋸忠忠瞋目視賊大罵曰我天朝臣子恨不斬汝以
歸報朝廷肯從汝求生耶罵不絕口乃從容賦詩而

元較史為詳謹識

陳洽傳

周安附

臣

章宗瀛按周安傳維鱗明書作劉

安事跡歷官俱同惟明史藁作周安謹識

李彬傳永樂元年四月以邱福議封豐城侯

臣章宗

瀛按傳維鱗明書云護孝仁皇后至京明年封豐城

侯史作以邱福議封侯未知何據謹識

李彬傳清化府土巡檢黎利反

臣章宗瀛按明紀事

本末云清化府俄樂縣土官巡檢黎利初從陳季擴

充偽金吾將軍後束身歸降以為巡檢然中懷反側至是反僭稱平定王識大錄同較史為詳謹識

李彬傳潘僚者又安土知府也為中官馬騏所虐反衙

儀

臣

章宗瀛按潘僚之叛識大錄云又安土指揮

路文律從之史畧其事謹識

李彬傳范玉者塗山侍僧也反東潮州

臣

章宗瀛按

識大錄云妖僧范玉自言天降劍印今為安南國主

亦僭稱羅平王反塗山較史為詳謹識

李彬傳

孫旻附

尋坐事罷

臣

章宗瀛按李旻罷坐史

不詳坐事原委他書俱無可考謹識

柳升傳妖婦唐賽兒反命升與都指揮劉忠將京軍往
勸圍其寨升自以大將意輕賊賊乞降信之為夜所
襲劉忠流矢死賽兒遁去及明始知追獲其黨百餘
人都指揮衛青力戰解安邱圍升忌其功推辱之

臣章宗瀛按明紀事本末云行在戶部尚書吳中等
劾奏柳升賊臨境不設備都指揮劉忠身先軍士幾

破賊壘升忌其功不救致忠力盡而死賊遂遁去及
備倭指揮衛青聞賊圍安邱急躬率所部兵晝夜兼
行遂敗賊衆後三日升始至反忌青功故行推擊較
史為詳謹識

柳升傳慶强起告升升不為意

臣章宗瀛按明紀事

本末云梁銘李慶曰主帥氣甚驕兵累日不得休困
罷而少斥堠不據險握重而欲急發卒如敵伏何較
史為詳然作銘慶語與史小異豈傳聞異詞耶謹識

梁銘傳坐事下獄

臣章宗瀛按梁銘下獄史不詳坐

事原委傳維鱗明書亦不載他書無可考謹識

王通傳斬其司空丁禮以下萬餘級

臣章宗瀛按明

紀事本末作司空丁禮司徒黎多史畧其一謹識

王通傳利乞和通以聞

臣章宗瀛按利乞和通以聞

考明紀事本末云通自寧橋之敗氣大沮喪雖獲城
下一勝而志不固且意柳升師雖出道路多梗黎利
既求和不如徇其所請按察司楊時習曰奉命征討

乃與賊和棄地旋師何以逃罪通厲聲叱之曰非常之事非常人能之史俱未詳謹識

明史卷一百五十四考證